

Vijeće ministara

Jučer je Predstavnički dom Parlamentarne skupštine Bosne i Hercegovine potvrdio novi sastav Vijeća ministara Bosne i Hercegovine. Visoki predstavnik je zadovoljan što je konačno došlo do ovog i članovima Vijeća ministara želi uspjeh u radu.

Međutim, zbog gubitka nekoliko mjeseci, Vijeće ministara mora udvostručiti svoje napore u narednim mjesecima. Visoki predstavnik očekuje da će se prva konstituirajuća sjednica održati u roku od nekoliko narednih dana. On isto tako očekuje od Parlamentarne skupštine da radi zajedno sa Vijećem ministara da bi se osiguralo da se ključni zakoni usvoje bez problema.

Međutim, pravi posao u vezi s ovim tek predstoji. Članovi Vijeća su upoznati sa prioritetima OHRa, da ih navedemo samo nekoliko: Zakon o budžetu za 1999. godinu, Zakon o civilnoj avijaciji, implementacija Zakona o državljanstvu, Zakona o izbjeglicama, imigraciji i azilu u Bosni i Hercegovini. OHR se dogovorio sa predsjedavajućim da je potrebno odmah uzeti u razmatranje ovaj program rada, kao i razmotriti pitanje na koji bi se način strukture Vijeća ministara mogle učiniti efikasnijim.

Sjednica Predstavničkog doma je bila narušena zbog toga što su delegati SDSa i SRSa napustili sjednicu. Razlog koji je naveden za ovakvo ponašanje se može uzeti jedino kao izgovor. Kopredsjedavajuće, potpredsjedavajućeg, ministre i zamjenike ministara u Vijeću ministara je imenovao Parlament u potpunoj saglasnosti sa Ustavom. Visoki predstavnik bi želio jasno da stavi na znanje da je bojkotiranje sjednica apsolutno neprihvatljivo, posebno u vrijeme kada se na dnevnom redu Parlamentarne skupštine nalaze zakoni od fundamentalne važnosti za živote građana u ovoj zemlji. On apelira na delegate SDSa i SRSa da ispune svoje obaveze i ponovo zauzmu

svoja mjesta na slijedećoj sjednici. U suprotnom se dovodi u pitanje vjerodostojnost opredjeljenja njihovih stranaka za javno dobro i implementaciju Daytonskog sporazuma.

Visoki predstavnik očekuje da će Predstavnički dom održati svoju slijedeću sjednicu 10. februara, kao što je to već dogovoreno na Kolegijima. Prvi prioritet bi trebala da bude odluka o državnoj himni Bosne i Hercegovine.